

11. februar 2016

UPA 2016/72

Inatsisartut suleriaasiat § 36 naapertorlugu apeqquteqaat aallaavigalugu oqallisissiaq matumuuna imaattoq matumuuna saqqummiuppara.

Tunami aalisarnikkut piniarnikkullu inuussutissarsiutinik ineriartortitsinissaq, tassungalu ilanngullugu tunitsivinnik attanneqarsinnaasunik pilersitsinissaq kiisalu Ittoqqortoormiuni, Tasiilami eqqaannilu aalisariutinik ineriartortitsinissamut pitsaasunik tunngavissaqarnissaq pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen Partii Naleraq)

Tunngavilersuut:

Ittoqqortoormiini Tasiilami nunaqarfiinilu aalisarnikkut siuarsaanissaq, taamatullu piniakkanik atorluaanikkut aamma tunisassiorfinnik ineriartortitsinissaq kiisalu aalisariuteqarnikkut siursaalluni ineriartortitsinissamik siuarsaanissaq eqqarsaatigalugu qanoq iliorluta ataatsimoortumik alloriarnissaq eqqarsaatigalugu isummersoqatiginnissaq pillugu Partii Naleqqamiit Nunatta kangiani ineriartortitsinissamik siunnerfilimmik oqallinnissamik siunnersuuteqarpugut neriuppugullu tamanna inatsisartuni ilassilluarneqassasoq pisariaqartitsinermi annertuummat aallartittariaqalerlunilu.

Ittoqqortoormiini, Tasiilami nunaqarfiinilu, piniarnikkut aalisarnikkullu ineriartortitsinissaq aammalu aalisariuteqarnikkut siuarsaanissaq tunitsiveqarnikkullu pitsanngorsaanissaq eqqarsaatigalugu ataatsimoortumik isummersoqatigiinnissamik matumuuna saqqummiussaarpugut, pissutsit aalisarnikkut piniarnikkut tunisassiornikkullu atugassarititaasut innuttaasunut pitsaanerulernissaat anguniarlugu, matumanilu Sermersuup kommunia innuttaasut kiisalu tunisassiornikkut suliallit suleqatigalugit alloriartitsinissaq angusariaqalermat.

Aalisarnikkut piniarnikkullu periarfissat pitsaanerulissappata taava siullermik tunitsiviit ullutsinnut naleqqunnerusut, aammalu aalisariutit imarsionermi umiatsiaqqanit pisinnaanerusut pissarsiarinissaat aqqutissiuttariaqalerparput, tassami Tunumi suliffissaaleqisut amerlapput pingaartumik inuusuttut eqqarsaatigalugit.

Tamannalu ajornartorsiut qaangerlugu qaangerniarlugulu suliniutit pitsaanerulissappata aalisarnikkut piniarnikkullu periarfissat tunisassiornikkullu annertusarneqarnissaat aqqutissaavoq pingaarluinnartoq, inuusuttullu suliffissaaleqisut eqqarsaatigissagaanni suliffiillu pilersinneqarsinnaasut nutaat imaani nunamilu pilersinneqarnissaat

pingaarluinnarpoq, matumanilu alloriarnissarput alloriartitsinissarpullu maannakkut ataatsimut suleqatigiissutigisariaqalerparput.

Aningaasarsiornikkut ineriartorneq Ittoqqortoormiini Tasiilami nunaqarfiinilu nukittunerulissappata taava aalisarnikkut tamakkiisumik atorluanggisatta tassalu Tunumi aalisagarpassuit piniakkallu tunisassiornikkut suliffissaqartitsinikkullu atorlualnissaannut ammaassisoqartariaqarpoq matumanilu aningaasalersuinissarput pinngitsoorsinnaangilarput, immikkullu nunatta kangiani Ittoqqortoormiit Tasiilaq nunaqarfiilu inuussutissarsiornikkut siuarsaaffiginissaat eqqarsaatigalugu aningaasaliiffigisariaqarparput.

Ukiuni makkunani nunatta sinnerani aalisarnikkut ineriartorneq annertusiartuinnavippoq unammilleqatigiinneq qujanartumik annertusiartorpoq aalisagaatittalu avammut niuerutigineqarnerat ajunngilluinnartumik ingerlavoq aamma akitigut.

Tamannalu aamma nunatta kangiani atuuttariaqalersoq Partii Naleqqamiit isumaqarluinnarpugut, ineriartornermi aamma malinnaatinneqarnissaat inuuniarnikkullu atukkat suliffissaqarnikkullu eqqarsaatigissagaanni pitsaanerulersittariaqarpagut tamannalu immikkut aningaasalersuinikkut angusinnaavarput pissutsimmi pitsaanerulissappata oqartussaasut ataatsimoortumik aningaasalersuinikkut piorsaanikkullu ataatsimoorfigisariaqalerparput pisuussutigummi atunngisagut nunatta kangiani tamakkiisumik atulissagutsigit.

Inatsisartut oqaaseqaatissaattut siunnersuut.

Tunumi inuussutissarsiornikkut siursaanissaq pimoorullugu ingerlanneqalernissaa anguniarlugu, tunisassiornikkut aalisarnikkut aammalu aalisariuteqarnikkut siursaaasoqarnissaa anguniarlugu Inatsisartut Naalakkersuisut kammattorpaat sulissutigalugu anguniaqqullugu, siunissamimi puisit amii kisiisa Tunumi isumalluutigineqarsinnaangimmata, aalisarnikkummi periarfissat aningaasalersuinikkullu annertusarlugit ammaanneqartariaqalerparput.

Oqallilluarisi!

Hans Enoksen
Partii Naleraq

